



NOTA IMPRENSA

KONSILIASAUN ENTRE REPÚBLIKA DEMOKRÁTICA TIMOR-LESTE NO KOMUNIDADE AUSTRÁLIA

HAIA, LORON 26 FULAN-DEZEMBRU TINAN 2017

Timor-Leste no Austrália kontinua ko'alia ho Joint Venture ba Greater Sunrise no konkorda prazu hodi asina tratadu ketan tasik nian

Komisaun Konsiliaun halao sorumutuk iha semana daruak fulan-dezembu tinan 2017 nian iha Singapura ho Repúblika Demokrátika Timor-Leste (“**Timor-Leste**”) no Komunitade Austrália (“**Austrália**”), nune'e mós ho Joint Venture ba Greater Sunrise nian. Sorumutuk ne'e nia objetivu mak, atu haree fila fali progresu ba dezvoltamentu kampu gás sira Greater Sunrise nian no atu marka prazu ba assinatura ba tratadu ketan tasik nian ne'ebé governu rua konkorda ona.

Sorumutuk sira ne'e hola parte ba diálogo estruturadu ida iha âmbito konsiliaun entre Timor-Leste no Austrália ne'ebé Komisaun Konsiliaun ida mak diriji tuir Konvensaun ONU nian kona-ba Lei Tasi nian no ho apoia Tribunal Permanente Arbitrajen (“**TPA**”) nian. Iha prosedimentu konsiliaun nian, Parte sira konkorda tiha ona kona-ba testu ba tratadu ida ne'ebé fahe ketan tasik entre sira iha Tasi Timor no ko'alia mós kona-ba estatutu jurídiku kampu gás Greater Sunrise nian, hametin Rejime Especial ida ba Greater Sunrise, dalan ida ba dezvoltamentu rekursu nian, no fahe reseita ne'ebé hetan.

Tratadu kona-ba Ketan Tasik

Iha loron 30 fulan-agostu tinan 2017, governu Timor-Leste no Austrália hetan ona akordu ida kona-ba Akordu Pakote Abranjente kona-ba ketan tasik iha Tasi Timor. Akordu ida ne'e formaliza tiha ba tratadu esbosu ida no representante governu idak-idak nian asina ona iha fulan-outubru tinan 2017 iha Haia.

Jeralmente, tratadu esbosu ne'e hafahe ketan tasik entre Timor-Leste no Austrália iha Tasi Timor no estabese Rejime Especial ida ba área ne'ebé iha kampu gás Greater Sunrise ne'e. Tratadu esbosu ne'e mós estabese aranju sira hodi fahe reseita, iha ne'ebé reseita *upstream* [faze inísiu ba esplorasun no produsaun] ne'ebé aloka ba Parte idak-idak sei la hanesan depende ba benefísiu *downstream* [prosesu ikus] nian ne'ebé liga ho konseitu dezvoltamentu sira ne'ebé la hanesan ba kampu gás Greater Sunrise ne'e.

Konklui tiha ona sira nia prosesu internu nian, governu rua konkorda ona katak sira sei hakat ba assinatura iha hahú fulan-marsu tinan 2018 nian.

Dezvoltamentu Greater Sunrise

Hola parte ba pakote abaranjente ne'e, Akordu loron 30 fulan-agostu inklui ‘planu asaun’ ida ba envolvimentu kona-ba dezvoltamentu ba kampu gás Greater Sunrise ne'e. Haktuir planu asaun ida ne'e, governu rua no Joint Venture ba Greater Sunrise (sira ne'ebé kaer lisensa ba rekursu ne'e) tuir ona sorumutuk no diskusaun sira ne'ebé klean dezde fulan-setembru tinan ne'e, inklui sorumutuk tolu trilateral nian iha fulan-novembru no fulan-dezembu tinan 2017 iha Brisbane, Singapura no Melbourne. Durante sorumutuk hirak ne'e, governu sira no Joint Venture buka atu elabora no hetan akordu ida kona-ba konseitu dezvoltamentu ba kampu gás Greater Sunrise nian.

Haree ba progresu sira ne'ebé sorumutuk trilateral ne'e hetan ona, governu rua konkorda ona katak Komisaun

sei envolve diretamente ho sira no ho Joint Venture hodi rezolve kestaun sira ne'ebé sei iha no katak desizaun ida kona-ba konseitu dezvoltimentu sei desidi iha loron 1 fulan-marsu tinan 2018.

Hakat sira tuir mai

Komisaun, governu rua, no Joint Venture konkorda tiha ona ba planu asaun adisional ida hodi rezolve kestaun balu ne'ebé sei iha hodi bele hetan desizaun ida ne'ebé sei foti iha loron 1 fulan-marsu tinan 2018. Hola parte ba planu asaun adisional ne'e, Komisaun prevee sorumutuk balu tan ho governu rua no Joint Venture iha fulan-janeiru no fulan-fevereiru tinan 2018.

Lao hamutuk ho prosesu ida ne'e, governu rua sei identifika data loloos ida ba asinatura ba tratadu ne'e iha fulan-marsu tinan 2018. Governu rua oras ne'e daudaun prepara hela material balu kona-ba tranzisaun no halo konsultasaun ho sira ne'ebé karik sei hetan afeta husi ketan foun ne'e, molok fó sai termu sira tratadu nian ne'e ba públiku.

Komisaun antisa katak nia relatóriu sei hotu no fó sai ba públiku iha fulan-abril tinan 2018.

Kontestu husi Prosesu Konsiliaun nian

Komisaun Konsiliaun nian, harii iha loron 25 fulan-juñu tinan 2016, nu'udar estabelese ona iha aneksu V Konvensaun nian, kompostu husi membru lima, ne'ebé prezide husi Exelentísimu Embaixador Peter Taksøe-Jensen (Dinamarca). Sira seluk ne'ebé hola parte ba ekipa ne'e mak Dra.Rosalie Balkin (Austrália), Juiz Abdul G.Koroma (Serra Leao), Profesór Donald McRae (Kanadá no Zelândia Foun) no Juiz Rüdiger Wolfrum (Alemaña). Tuir akordu husi Parte sira, Tribunál Permanente Arbitrajen sei fó apoiu administrativu durante Konsiliaun ne'e.

Konsiliaun ne'e hahú iha loron 11 fulan-abril tinan 2016, liuhusi Notifikasaun kona-ba Instituisaun Konsiliaun nian, tuir Seksaun 2 husi Aneksu V Konvensaun nian" ne'ebé Timor-Leste haruka ba Austrália.

Iha loron 2 fulan-maiu tinan 2016, Austrália hatama ona "Resposta Austrália nian ba Notifikasaun Konsiliaun".

Iha loron 28 fulan-jullu tinan 2016, Komisaun Konsiliaun hala'o sorumutuk prosesuál ida ho Parte sira, iha Palásiu Pás, iha Haia, iha Olanda.

Iha loron 29, 30 no 31 fulan-agostu, Komisaun ne'e hala'o Sesaun Abertura Konsiliaun nian no Audiência kona-ba Kompeténsia, iha Palásiu Pás nian Haia, iha Olanda.

Iha loron 19 fulan-setembru tinan 2016, Komisaun fó-sai "Dezisaun kona-ba Kompeténsia", hodi konklui katak Konsiliaun ne'e iha continuidade.

Husi loron 10 to'o loron 13 fulan-outubru tinan 2016, Komisaun hala'o sorumutuk ho Parte sira iha Singapura.

Iha loron 9 fulan-janeiru tinan 2017, Ministru Negósius Estranjeirus Timor-Leste nian no Ministru Negósius Estranjeirus Austrália nian, hamutuk ho Komisaun, fó-sai Deklarasaun Trilateral Konjunta ida kona-ba terminasaun ba Tratadu ba Aranjus Balu iha Tasi Timor [CMATS].

Husi loron 16 to'o 20 fulan-janeiru tinan 2017, Komisaun ne'e hasoru-malu ho Parte sira iha Singapura.

Husi loron 27 to'o 31 fulan-marsu tinan 2017, Komisaun ne'e hasoru-malu ho Parte sira iha Washington, D.C.

Husi loron 5 to'o 9 fulan-juñu tinan 2017, Komisaun ne'e hasoru-malu ho Parte sira iha Kompeñaga.

Husi loron 24 to'o 28 fulan-jullu tinan 2017, Komisaun ne'e hasoru-malu ho Parte sira iha Singapura.

Husi loron 28 fulan-agostu to'o loron 1 fulan-setembru tinan 2017, Komisaun hasoru-malu ho Parte sira iha Kopeñaga.

Iha loron 30 fulan-agostu tinan 2017, Parte sira hetan Akordu kona-ba Pakote Abranjente ida kona-ba elementu sentrá sira husi delimitasaun ketan-tasik sira entre nasaun rua ne'e iha Tasi Timor. Aleinde ketan sira ne'e, Akordu kona-ba Pakote Abranjente ne'e ko'alia kona-ba estatutu jurídku kampu gás Greater Sunrise nian, establesimentu Rejime Espesiál ida ba Greater Sunrise, dalan ida ba dezvoltimentu rekursu ne'e no fahe reseita ne'ebé hetan.

Iha loron 13 fulan-outubru tinan 2017, hafoin sorumutuk iha Haia, Parte sira ne'e hetan akordu ida kona-ba testu integrál husi projetu tratadu nian ida, hanesan antesipa ona iha akordu loron 30 fulan-agostu nian. Tratadu ida-ne'e delimita ketan-tasik entre nasaun rua ne'e iha Tasi Timor no ko'alia kona-ba estatutu jurídku kampu gás Greater Sunrise nian, establesimentu Rejime Espesiál ida ba Greater Sunrise, dalan ida ba dezvoltimentu rekursu no fahe reseita ne'ebé hetan.

Iha loron 18 fulan-novembru 2017, Komisaun hasoru malu ho Parte sira no Joint Venture iha Singapura.

Atu hetan informasaun barak liután kona-ba kazu ida-ne'e bele haree iha www.pca-cpa.org/en/cases/132/, ne'ebé inklui testu kompletu husi Desizaun Komisaun nian kona-ba Kompeténsia, gravasaun no transkrisaun Sesaun Abertura, apresentasaun husi Parte sira, Nota Imprensa sira uluk nian no Deklarasaun Trilaterál Konjunta sira.

Kontestu Tribunál Permanente Arbitrajen nian

Tribunál Permanente Arbitrajen nu'udar organizasaun intergovernamentál ne'ebé harii iha tinan 1899 husi Konvensaun Haia kona-ba Solusaun Pasífika ba Konflitu Internasionál sira. TPA kompostu husi Parte Kontraentre 121. TPA ninia sede lokaliza iha Palásiu Pás, Haia, iha Olanda. TPA fasilita arbitrajen, konsiliaun, investigasaun ba faktu sira no métodu sira seluk kona-ba rezolusaun konflitu, entre kombinasun oin-oin husi Estadu sira, entidade estatál, organizasaun intergovernamentál sira no parte privada sira. Departamentu internasionál (*Internasionál Bureu*) TPA nian daudaun ne'e administra hela disputa 5 entre Estadu sira, kazu arbitrajen nian 76 ne'ebé envolve investidór ida no Estadu ida no kazu 45 ne'ebé mai husi kontratu ne'ebé envolve Estadu ida ho entidade públika ida. Atu hatene informasaun barak liután kona-ba TPA ne'e bele haree iha www.pca-cpa.org.

Kontaktu:

Tribunál Permanente Arbitrajen

Email:bureau@pca-cpa.org